

# ENTREVISTA

## YANN LESPOUX « *L'IDENTITAT*

## *DOBÈRTA PÒT PROFEITAR A TOTES* »

**D**ins gaireben una setmana, arribaràn a Montpelhièr los primièrs congressistas de la Federacion per las Lengas Regionalas dins L'ensenhament Public (*FLAREP*). A cada collòqui es una associacion-sòcia qu'aculhís l'ensemble de la federacion dins son pròpre país. Per ongan, lo programa es establìt, las intervencions caladas e los convidats son esperats. Lor manca pas mai que de debatre ! En l'ocurréncia, lor òste serà la Federacion dels Ensenhaires de Lengas e de Cultura d'Òc (*FELCO*) sus mantuns fronts a aquel moment, especialament amb la reforma del collègi.

Dins los nostres dossièrs sul sicut, avèm volgut donar la paraula als ensenaires e far parlar las chifras. Podèm pensar que se geinaràn pas per far çò-mèsme entre las parets venerablas de l'Opéra Comédie o al *Gazette Café*. Avèm volgut parlar amb lo president de la *FELCO* d'aquelas problematicas d'identitat que seràn al còr del collòqui e de la necessitat de ne debatre a l'escala ciutadana. Èra tanben l'escasença de reculhir los darrièrs ressons del terren tocant als efèits concrets de la reforma del collègi o encara far un bilanç del mandat de François Hollande per çò qu'es l'ensenhament de las lengas.

**La Setmana — Sètz vosautres qu'aculhitzatz l'ensemble dels delegats de la FLAREP dins una setmana. Tot es prèste ?**

**Yann Lespoux —** Òc, esperam pas mai que los congressistas. Tot es prèste mercés al *CREO* de Lengadòc qu'a ajudat la *FELCO* a organizar la manifestacion.

**LS — Sètz professor d'Istòria dins la seccion d'occitan de l'Universitat Paul-Valéry, una sciéncia plan mesa a contribucion d'aquesta passa. Cossí abordatz la question de l'identitat per aquel biais ?**

**YL —** I a mai d'una façòna d'abordar aquela question. Soi pas segur que lo cors d'Istòria siá fait per ensenhar una identitat mas efectivament es un cors qu'es centrat sus d'identitats.

**LS — Pasmens, se pòt causir de pas seguir forçadament l'istoriografia tradicionala e de cambiar los punts de repèris. Es quicòm que fasètz ?**

**YL —** Lo professor d'istòria es relativament liure dins sos cors. A un programa a respectar mas o pòt abordar a son biais. Los exemples suls quals apiejarà son cors, es a el de los anar quèrre. Per exemple, un ensenaire que fa d'istòria en occitan se pòt apiejar sus de fàits istorics que son mai en rapòrt amb la civilizacion occitana. Après, per tornar al debat que serà al centre del collòqui a Montpelhièr, vos pòdi dire que fa longtemp que los professors ensenhan pas mai l'istòria a la façòna de la tresena Republica. Los òmes politics an qualques decennis de retard aquí-dessús. Aquò farà benlèu cinquanta ans que nos servissèm pas mai d'aquelles concèptes.



Yann Lespoux, president de la *FELCO*, ensenha l'istòria a la seccion d'occitan de l'universitat Paul-Valéry. (DR)

**LS — L'identitat e l'alteritat son de tèmas que son d'una actualitat perpetua ?**

**YL —** Segur, sèm dins un mond qu'existisson d'identitats que s'opausan o que compausan las unas amb las autras. Es tot lo subjècte del collòqui : cossí abordar l'identitat de façòna dobèrta ? Cossí respectar l'autre en se fasent mai ric mercés a son identitat e en partatjant la seuna ? Los problèmas identitaris son de problèmas ligats a de monde qu'an una vision barrada de l'identitat.

**LS — Aquela vision « barrada », vos sembla que se torna expandir ?**

**YL —** Òc, me sembla que s'expandís fòrça en causa de totes aqueles movements que se dison justament « identitaris », amb totes aqueles debats que podèm aver suls migrants o encara sus l'Islam. Aquel collòqui serà l'escasença per nosautres de prendre tot aquò a revèrs e mostrar que l'identitat dobèrta pòt profèitar a totes.

**LS — Rapelam que, coma president de la FELCO, foguètz del viatge per anar veire los collaborators de la ministra al mes de julhet amb la presidenta de l'OPLO. Parlèrem fòrça dels efèits de la reforma del collègi sus l'ensenhament de l'occitan dins lo segondari. Avètz agut de ressons suls primièrs efèits concrets de la reforma per aquesta dintrada ?**

**YL —** Los ressons qu'avèm son pas gaire bons. Òm nos senhala de problèmas a d'unes endrets amb de baissas d'oras. De collègas son preocupats sul biais que se debanarà l'an que ven. O sèm amb eles.

**LS — Dins un dossièr nòstre consacrat a la reforma, raportàvem de testimoniatges d'ensenaires fasent fàcia a una mesa en concurréncia de las opcions.**

**Dins aquel cas de figura, podèm parlar ara d'una vertadièra lei de la jungla ?**

**YL —** Dins d'unes endrets, òc. Lo problèma amb aquela reforma es que tot es pas unifòrme. Segon los establiments, segon la volontat de lor cap o segon la volontat del Rectorat, las causas se debanan pas del meteis biais d'en pertot. I a de collègas que se'n sortisson puslèu plan perque son plan sostenguts, d'autres patisson de dificultats de las fòrtas.

**LS — Arribam a la fin d'aquesta mandatura. Quina opinion ne gardaretz, respècte al trabalh del govèrn sus l'ensenhament de las lengas ?**

**YL —** Dirai qu'avèm agut un molon de promessas. La ratificacion de la Carta, la reforma de la Constitucion que se deviá faire mas avèm pas totjorn vist grand-cause. Avèm agut la reforma del collègi que nos a causat plan de lagui. Nos sèm batuts per ensajar de l'adobar al melhor. Ara esperam, abans la fin de la mandatura, qualques pichòtas avançadas. Benlèu una circulara que nos estada anonciada fa qualques meses e qu'esperam de veire se sortirà. Esperam benlèu una agregacion. Lo govèrn l'a promés als Còrses, benlèu profèitarà tanben a las autras lengas regionalas. La *FELCO* a escrit una letra a aquel subjècte al ministèri, la setmana passada. Dins l'ensemble, podèm pas dire que lo bilanç es flame. Pasmens, Olivier Noblecourt (director del cabinet adjunt de Najat Vallaud-Belkacem) serà present al collòqui per representar la ministra. Es un signe que lo ministèri s'interessa a la question. Quitament se avança pas pro, avèm pogut aver un dialòg.

ENTREVISTA CLAMENÇ PECH

Inf. : [www.flarep2016.com](http://www.flarep2016.com)